

Peter Engler è nov president

Radunanza da la cumissiun d'interess turissem

■ (rtr) La cumissiun d'interess turissem en il Grischun ha in nov president. Peter Engler, il CEO da las pendicularas da Lai, è vegnì elegì a la radunanza generala sco nov president. Il presidi n'è betg la suletta midada tar la cumissiun d'interess turissem Grischun.

Perquai ch'intgins commembers n'eran betg cuntents cun la situaziun da la cuminanza d'interess turissem, l'ITG. Ina grupp da lavur ha elavurà novs statuts e proponì novs commembers per la suprastanza.

Nova suprastanza

La ITG ha già en il passà adina puspè conflicts d'interess. Memia bleras gruppas han fatg part da la suprastanza e combatì per lur interess. Uschia n'ha la cuminanza betg pudì preschentar schliaziuns che correspundevan a tuts. Ina grupp da lavur ha proponì novs commembers da las grondas gruppas. Unanim èn Franz Sepp Caluori, president da Gastro Grischun, Silvio Schmid, president da las pendicularas, Ernst Wyrsch, president Hotelleriesuisse Grischun e Marcel Friberg da Grischun Vacanze vegnids elegids.

Dus commembers èn anc pendants. Els vegnan elegids anc durant quest onn. La suprastanza è vegnida pli schlanca. Ils commembers èn represchents da las grondas branschas. Ils represchents dals purs u dals impressaris na fan betg part pli.

La grupp da lavur ha decidì novas finamiras per la cuminanza d'interess. Ella duess sensibilisar la populaziun per il



Peter Engler è nov president da la cumissiun d'interess turissem. RTR, M. DECURTINS

turissem, coordinar la comunicaziun, optimar las cundiziuns per il turissem e la furmazion dad ina rait cun politica, medias e societad.

La cuminanza d'interess ha in problem d'image, di il nov president Peter Engler. Las davosas votaziuns n'èn betg vegnidas acceptadas dal suveran, per exempel la lescha davart las taxas turisticas u la candidatura per il Gieus olimpics 2022. Quai sto sa midar.

Per realisar las finamiras duess en futur in club da turissem gidar. En quel club duessan maximal 20 deputads dal cussegl grond far part che s'engaschan a favur dal turissem. Uschia duess vegnir fatg pli intensiv lobbying per il turissem Grischun. Era las novas statutas èn vegnidas approbadas unanim a la radunanza generala.